

### **Nassuiaatit nalinginnaasut**

Usit imaatigut assartorneqartut Kalaallit Nunaannut, Kalaallit Nunaannit imaluunniit Kalaallit Nunaanni namminermi assartorneqarnerat apeqqutaatillugu assartuinermi akiligassat akileqquneqartut procentianik aalajangersimasumik akitsuusiussap Inatsisartunit assigiinngiiaartumik aalajangiiffigineqarsinnaanissaata tunngavissiuunneqarnissaa pequssutissatut siunnersuutikkut siunertarineqarpoq.

Procenti aalajangersimasooq akitsuusiussaq Inatsisartut aningaasanut inatsisaanni ukiumoortumi oqaasertaliussani Inatsisartunit aalajangersarneqartarpoq.

Siunnersuut allaffissornikkut ingerlatsinermut kingunerisaqassanngilaq.

### **Aalajangersakkanut ataasiakkaanut nassuiaatit**

#### *§ 1-imut*

Usit imaatigut assartorneqartut Kalaallit Nunaannut, Kalaallit Nunaannit imaluunniit Kalaallit Nunaanni namminermi assartorneqarnerat apeqqutaatillugu assartorneqarnerinut akiligassat akileqquneqartut procentianik aalajangersimasumik akitsuusiussap assigiinngiiaarsinnissaanut Inatsisartut periarfissinneqarnissaat siunnersuutigineqarpoq. Aalajangersakkakuttaaq Inatsisartut periarfissinneqarput pineqartut taakku arlaata ilaasaluunniit akitsuutaata 0-imut aalajangersarnissaanut.

Akitsuutip akileqquneqartup Kalaallit Nunaanni sumiiffinnut allanut assartuussisarnermi aningaasartuutaasartunut matusissutissaanissaanik aalajangersakkap atorunnaarsinneqarnissaa peqatigitillugu siunnersuutigineqarpoq, tassami akitsuutitigut Nunatta karsiata isertittagaasa ilaasa siunertanut aalajangersimasunut atugassanngortinneqarnissaat pitsaasusorineqanngimmat.

#### *§ 2-mut*

Inatsisartut pequssutissaattut siunnersuutip 15. november 2001-imi atortuulernissaa 1. januar 2002-miillu sunniuteqalernissaa siunnersuutigineqarpoq taamaalilluni assartorneqartut assartornerinut akiliutissatut akileqquneqartut ullormi tassanngaaniit atuuffigissallugit.